

四庫全書

集部

欽定四庫全書

集部

知稼翁集卷上

詳校官起居注主事<sub>臣</sub>顧宗泰

主事<sub>臣</sub>呂雲棟覆勘

覆校官編修<sub>臣</sub>沈清藻

校對官學正<sub>臣</sub>常循

謄錄監生<sub>臣</sub>潘河

欽定四庫全書

集部四

知稼翁集

別集類三 宋

提要

臣等謹案知稼翁集二卷宋黃公度撰公度字師憲莆田人紹興戊午進士第一歷官考功員外郎文獻通考載公度集十一卷卷端洪邁序稱公度既沒其嗣子知邵州沃收拾手澤彙次為十有一卷卷末載有沃跋亦稱

故笥所存塗乙之餘纔十一卷均與通考合  
又通考詞曲部別有公度知稼翁詞一卷合  
之當為十二卷此本為天啟乙丑其裔孫崇  
翰所刊稱嘉靖丙午得於陝西謁選人乃前  
朝秘府之本尚有御印然併詞集合為一編  
僅一百三十四頁分為上下二卷似不足十  
二卷之數豈尚有佚遺歟公度早掇巍科而  
卒時年僅四十八仕宦不達故宋史無傳肇

慶府志稱其為秘書省正字時坐貽書臺官  
言時政罷為主管台州崇道觀過分水嶺題  
詩有誰知不作多時別依舊相逢滄海中之  
句時趙鼎方謫潮陽說者謂此詩指鼎而言  
遂觸秦檜之怒令通判肇慶府云云殆亦端  
慙之士不附時局故言者得借趙鼎中之歟  
其詩文皆平易淺顯在南宋之初未能凌躐  
諸家然詞氣恬靜而軒爽無一切澁澀齷齪

之態是則所養為之矣公度別有漢書鐫謨  
今已佚此本從他本掇拾二段併佚詞一首  
附之卷末今亦併錄之焉乾隆四十二年六  
月恭校上

總纂官

臣紀昀臣陸錫熊臣孫士毅

總校官臣陸費墀

知稼翁集原序

乾道五年冬順昌令黃君沃書抵中都來告曰先君考  
功力學半世雖得一第而仕不克顯平生所為文僅十  
一通願得序引以冠其首余方備機政未暇也越明年  
出守長樂郡復多事少暇隙又明年順昌使其弟洵來  
責前諾仲秋既望積雨乍晴天氣澄爽退食郡齋因取  
考功文徧觀之典重溫雅如其為人其詩格律森嚴興  
寄深遠雖未盡追古作要自成一家間與予里居唱和

數篇余讀而深悲之公以文章魁多士有盛名於時曾  
中灑落議論宏壯識者期之甚遠而官止外郎年四十  
八以殞所以傳世垂後者止此而已是可傷也昔白樂  
天與元居敬善及序其遺文有曰黃壤豈知我白頭猶  
念君唯將老年淚一灑故人文執筆愴然蓋有感於斯  
言公諱公度字師憲戊午同年進士也莆陽陳俊卿序  
高宗一馬化龍訖于異位自丁未至壬午三十六年間  
策進士數千計擢居大龍甲者十有一人科名巍峩副

以屬望視富貴岐轍若長風掛席一息萬里於是文靖  
梁公至宰相景明陳公冠樞極位尚書者三汪聖錫劉  
文孺王宣子也它侍從者五李順之張子韶趙莊叔張  
安國王龜齡也惟莆田黃公師憲名聲最卓卓而財至  
尚書郎壽不滿半百夢幻覆手天殲此良大車云徂出  
門折軸人到于今傷之爰初登第以行卷忤秦相君旋  
為趙忠簡公禮接益銜之弗舍坎壈摧摳無復有為天  
下惜人材之意一旦遇主則死及之嗚呼公既以詞賦

歷英躔故於詩尤精大氏鏗鏘蹈厲發越沈郁精深而不浮於巧平澹而不近俗與強名作詩者直相千萬風檣陣馬不足呈其勇犀渠鶴膝不足侔其珍悲秋之句曰迢迢別浦帆雙去漠漠平蕪天四垂雨意欲晴山鳥樂寒聲初到井梧知吾不知謫僊少陵以還大歷十才子尚能窺其藩否公既沒其嗣子邵州君沃收拾手澤彙次為十有一卷詩居大半焉它文悉從肺府源深流長迨樂府詞章宛轉清麗讀者咀嚼於齒頰間而不能

已惟其不沾於用身不到鑾坡鳳閣中鋪揚太平之闕  
休其所表暴如是而已魏國陳丞相既序其首而邵州  
又欲予贅語于後憶四十年前與公從容于番禺藥洲  
之上予作素馨賦公蓋戲而反之異於不相知聞者茲  
不宜辭若平生事業則有叅知政事龔公吏部尚書林  
公之銘在慶元二年十月庚申煥章閣學士宣奉大夫  
提舉隆興府玉隆萬壽宮魏郡公鄱陽洪邁序

欽定四庫全書

原序

欽定四庫全書

知稼翁集卷上

宋 黃公度 撰

賦

省試天子以德為車

治盛天子尊臨帝居每安行而在德遂取用以為車獨  
操馭世之權履茲寶位克廣長民之道端若安輿夫惟  
上纂洪圖俯綏赤子外以動化於羣下內以操脩於一  
已正宸心而御極其術何先運大德以為車莫安於此

豈不以貴主大器富包普天一猷為今立兆民之表正  
一號令今舉萬國以風傳是必動有彛訓事無過愆稟  
聰明睿智之資坐而撫御體駕實輝光之大用以周旋  
由是儼萬乘之威儀聳羣方之瞻視為輓軌以寓其賞  
罰謹銜轡以張其綱紀恭儉無爾偽之載忠信有在衡  
之倚其用若是非德曷以言無不聽前瞻進善之旌政  
在必行下順納民之軌懿夫名德之興也名久必泯權  
主之車也權傾則危曷若此厚以載物動而中規同五

帝以載驟與三王而並馳世底安寧之治上無顛覆之  
為出必自於聖門靡聞過舉行每遵於王路罔蹈非彝  
故得仁義由行兮虞舜與稽聖神廣運兮唐堯是則器  
蔑小人之盜輿有君子之得侍從僕御無非正乘豈假  
於王良出入起居罔不欽諫何煩於廣德厥後循治軌  
者世之顯顯蹈覆轍者日益駸駸不能任重而致遠豈  
知執古以御今以至化不流行無復置郵之速治亡祇  
懼徒嗟朽索之臨上方慎保基圖務綏黎庶中以視履

動而順豫既無隕越之失又絕奔馳之慮然則有大物者無他在審其御

解試和戎國之福

上聖圖治遠戎請和民獲安而不擾國膺福以滋多俯親庶俗之情信行蠻貊誕保有邦之祐時戢干戈嘗聞帝王盛時無不撫綏中夏治失其術則威尚詐力御得其道則悉歸陶冶惟天子脩盟講好德莫厚焉俾戎人稽首稱藩國之福也莫不膚使交聘丹誠遠通厚賜之

子女玉帛俾脩其朝覲會同用珪章而結好無甲冑以  
興戎我無詐而爾無虞遐陬內附災不生而禍不作百  
順來崇時其萬國懷柔四方澄寂內不聳於邊鄙外不  
擾于強敵措乃國於龜鼎脫斯民於鋒鏑良由禮招攜  
而柔服故得道建極而敷錫揉茲荒裔俾為不二之臣  
介爾中邦永保無疆之歷大抵異域之情今乍臣而乍  
叛中國之治今或替而或昇征之弗克者尚且聞於敗  
衄絕之弗通者猶未免於憑陵曷若此無老師而耀武

無好戰以終能下有方來之比福如川至之增所以事  
彼昆夷果見周家之盛會於戎子因知晉室之興彼有  
湯后征南宣王伐北或隆肇造之業或啟中興之德雖  
曰奉天而致討豈不靈財而傷力必也禮懷遠裔道交  
鄰國鞏王業以永固祐聖時於罔極羶裘氣暖行觀塞  
草之長沙漠風清坐見邊烽之熄前古既遠後王不思  
惟務力制類非德綏侯空號於定遠將徒勞於貳師閉  
玉關而謝質者不聞世祖罷朱崖而切諫者無復捐之

殊不知秦帝喜功必底亂亡之患武皇遠略迄成虛耗  
之危上方施厖澤以撫綏冀羣心之輯睦務使邇安而  
遠至蔑有兵窮而武黷故勤勤然誠意以通和駢臻百  
福

解試賢人國家之利器

賢進在位時稱得人為國家之利器實社稷之名臣挺  
生命世之英素韜大業推作有邦之用宰制羣倫惟王  
以一己之微受四方之寄謂萬機尤難於獨斷非衆材

孰與之共治顧此先知先覺是謂真賢施諸有國有家  
茲為利器文武兼備功名兩全國論未當今斷制爾待  
政體未善今刺裁爾專基永隆於不拔患潛消於未然  
足倚大事斯為巨賢五百年哲匠間生才名不世千萬  
里遐衝坐折英銳無前挺竒草澤之間露穎巖廊之地  
昔之窮也固嘗蓄銳以待敵今之達也詎可藏鋒而避  
事故或小而製錦今恢恢遊刃之施大而補袞今恪恪  
官箴之備隱而未見姑為囊穎之藏動則有成豈若鉛

刀之利彼有稱為大寶者蓋有取於瑰奇號以重器者  
示可鎮於傾危未若此剛節素稟堅忠不移厲其鍔則  
清庶之操淬其銛則智勇之資其用若是何利如之倘  
令追琢文章詞鋒益銳假使削平禍亂智刃攸麾茲蓋  
有學校漸摩今與之陶成有爵祿砥礪今使之勉飭動  
每濟世功斯利國專外閫則排折患難立中朝則剪鋤  
姦慝良由上聖之善任遂使百工之効職邦有史魚之  
矢直道而行邑皆言偃之刀歌聲不息厥後任文吏者

但事刀筆為武士者孰宣爪牙位徒叅於上列利何補  
於公家譬終日操鏞而薄効不就雖窮年用力而寸功  
莫加遂令頌激王褒鑄將求於巧冶賦陳賈誼鈍切嘆  
於鎔錙惟古聖明求茲英俊以敵愾則援干櫓於禮義  
以禦侮則全甲冑於忠信由是而治天下焉其有餘刃  
詩

僊霞道中阻雨

薄暮雨霏霏歸心恨不飛客程三日阻家舍半年違澗

澁水爭道山空雲觸衣憑誰洗光手取出太陽輝

題金沙驛

閩越飽溪山何如蜀道難驛行仍怯嶺舟駛復憂灘行  
李三秋杪居民百戰殘今宵投宿處茅店倚層巒

過使華亭悼七友

緣赴試漕臺  
覆舟於此

惡石亂崢嶸胡為君此行功名成底事舟楫悞平生天  
遠寧容問灘流本自鳴林猿如會意故作斷腸聲

奧村晚望

山逐寒雲斷天隨暮靄低  
稻畦迷上下樵徑自東西  
故國存書劒他鄉尚鼓聲  
涓埃期補報未敢卜幽棲

初秋夜坐

納涼北窓下景象有餘清  
林暝惟螢影庭幽但竹聲  
語闌驚坐久露重覺衣輕  
不寐饒詩思徘徊參斗橫

久雨阻西郊之遊

忽忽春將半冥冥雨未休  
過從喧屐齒追賞負觥籌  
詩句那排悶鶯聲巧喚愁  
晴郊饒勝槩何日許同遊

和宋永四兄集句

咏

時事干戈裏年光卷帙中有懷憂社稷無力靖華戎世  
路日多梗齋扉晝掩蓬悲歌撫長鋏爽颯氣摩空

會同年共樂臺

蘭省三千士莆陽十五人此時鄉曲會異日廟堂身名  
塞乾坤隘恩沾雨露新天邊三鴈遠回首獨凝神

賀孫使君

蓋

文宿動三吳于門應大儒中秋寒律近九葉瑞蓂敷錦

被樓郎舍朱幡鎮海隅金鰲淹從索銅虎暫分符德蔭  
紛桃李仁風暖袴襦祝公椿壽永千歲贊蘿圖

次韻宋永兄傷時二首

舉目江河異傷心漢闕低未聞軍折北誰復將征西志  
苦甘嘗膽身先願執轡時惟王事急六月尚棲棲  
目斷吳天遠魂飛楚塞低六龍巡漠北萬騎遶淮西寒  
月籠烟燧霜風遞曉輦征夫蝴蝶夢休傍故園樓

和徐子由

壽仁

題畫寂軒

木落孤城迥苔封古寺深結廬依近地隱几愜幽心細  
草秋仍綠脩篁晚更陰紅塵門外路六轡漫如琴

戲集老杜句再和

背堂資僻遠要路亦高深未負幽棲志回看不住心寒  
花隱亂草飛鳥度層陰獨遶荒齋徑新詩近玉琴

次方洛謀

疇

韻賀鄭宋英弄璋

渥洼產龍種筦簟兆熊禧木星光芒舒紫焰玉出崑山  
珠出隋徐卿憂何有于門高可期啼聲已識是英物成

立行看少壯時瓦盆盛酒醺四座我獨不許陪宗支眼  
穿難望惹牙齧吻燥不沾荷葉卮涓滴於人甘分絕枯  
腸強索祝兒詩祝兒效張良熟讀韜鈴為帝師祝兒效  
陳平磊落胸中吐六奇天驕捧首遁漠北豈容郊壘尚  
纍纍勿效文章致身者畫餅虛名天下知

松峰菴即席示同年

才子連鑣俯近垌霜風散逐馬蹄輕芳樽屢約同年會  
要路行看異日情境僻却嫌絲管沸坐闌轉覺笑談清

松峰自此宣高價不使慈恩獨擅名

溪諸同年和章久之無耗再用前韻

勞君攜酒出郊坰強緝巴詞醉墨輕我輩詎能捐習氣  
伊人底事寡詩情漫令投目朝朝望無復揮毫字字清  
冷淡生涯殊不惡想應著意諱窮名

庚申元日

繭足度殘臘回頭又一年文書疎病眼事業付高眠  
櫛從朝懶衾裯覺夜便南隣競春色車馬日喧闐

陪孫使君宴歸路口占呈應求宋永二兄

五馬風流在昇平笑樂空時難寸心異歲晚一樽同盡  
角寒雲外藍輿暮雨中歸來狎兒女殘燭耿紗籠

早春紅梅盛開有感

不與雪霜分素艷却隨桃杏競芳辰自知孤潔羣心妬  
故著微紅伴早春

少年桃李競青春回顧寒梅已丈人強欲施朱追俗好  
誰知翻是失天真

正月晦日寄宋永兄

萬事縈心空歲月一分春色已塵埃  
簷前雨脚何時斷陌上遨頭幾日來  
寒東幽花如有待風延啼鳥苦相催  
明年此會各南北趨取官閒共酒杯

和陳應求

俊卿

韻兼呈方次雲

耑

策蹇衝泥到野扉故人相對破愁眉  
話因別久卒難盡情逐杯深那更辭  
十里雲山乖素約一番桃李負幽期  
蕭蕭半夜空階雨亂滴枯腸百斛詩

次雲見過留宿有詩因賡其韻二首

茅舍囂塵外青燈笑語中相逢今夕歎忽憶去年同瓶  
澁傾無綠爐寒撥更紅卧聞窓雨響簷溜受斜風  
惜別情無賴狂吟意有餘琴尊閒院落花柳暗村墟行  
樂真聊爾論交莫後予畏糧山下約來往未應疎

家僮歸得王慶長必消息知留浙中秋舉

倦僕去復返憐君歸未能吟餘幽砌月夢破短檠燈地  
僻人稀到書成鴈莫憑秋風霜翮健天末看飛騰

春日懷王慶長

夜雨纔霑地朝暉已照牆  
潤畦舒菜甲暖樹拆茶槍  
敵騎潛沙磧關河息戰場  
王孫綠底事萍迹久他鄉

久不得浙耗

獨酌澆愁酒慵翻信手書  
折腰行俗吏投足且吾廬  
歲月鶯聲老江湖鴈影疎  
依棲五侯第旅食近何如

贈弟稚圭別

桂

行色動高蓋題詩寄短箋  
離亭春草外吉水暮雲邊  
鵬

鶚搏霜翅驂騑受玉鞭槐黃須努力好語及秋天

寄呈察推二兄廷直

埴

尺素書憑鴈足傳側身吟望楚江邊關山去我仍千里  
風月思君閱二年蓮幙宦情今好在莆川春色故依然  
相逢若問官閒事為道倉裘飽晝眠

漫成

時事含胡裏年華轉燭間利名多噉啖貧賤覺安閒致  
主知無術歸休幸有山茅堂一尊酒時得慰愁顏

千里共明月

僊掌露初凝  
高空月迴明  
雪霜千里色  
關塞一時情  
永夜驚烏鵲  
中原有弟兄  
清輝憐獨對  
良會苦難并  
目斷一天遠  
愁隨兩地生  
倚樓何處笛  
淒切送殘聲

鳥影度寒塘

秋色滿滿湘  
天寒玄鳥忙  
數聲離壘嶂  
片影度橫塘  
風翻搏寥廓  
烟蹤入渺茫  
乍隨萍荇沒  
還共水雲長  
冷浸千尋碧  
斜侵兩岸霜  
凝眸西塞遠  
踈點帶殘陽

和余子美洵即事二首

昏昏午汗浹桃笙醒眼清詩仗友生  
俘馘遙傳泮水捷  
渠書初解杏壇盟  
尊賴有論文酒  
舍肉應無遺母羹  
好種桑麻歸杜曲  
行藏休更問君平

黌堂歸去葛衣輕  
怪底形容太瘦生  
抖擻慳囊償酒債  
安排嶮韻主詩盟  
妖韶梅老自餘態  
滋味韓休薄大羹  
強策駑駘追逸駕  
不堪才力但平平

夏日陳應求見訪

酷暑避脩竹繁陰侵短楹形骸方枕簟車馬忽柴荆對  
酒情無極哦詩韻更清昏鴉催別急天末片雲橫

苦熱

玉井晨不冷茆簷午欲焚月搖看畫簷榴吐認紅裙迥  
野都如火竒峰空自雲衣巾負芒刺曝背有人耘

秋興二首

秋入蒹葭霜正威數聲歸鴈塞痕微欺人白髮蕭蕭得  
未老丹楓故故飛朔野玄黃多戰骨江湖風雨一蓑衣

百年庵飯從衰朽萬事塵寰有是非

牙叉老木抱江城城古江寒相對清雲鴈不逢音信杳  
沙鷗無數往來輕露華今夜凝僊掌詞藻他年動帝京  
淮海一身猶卧病關河千里未休兵

和宋永兄詠荔支用東坡刑字韻四首

枝頭血色萬年萍錯落橫天粲彗星昔日揚姬勞走驛  
一時王姥欲俱刑浪傳石蜜來他域巧似珊瑚出漲溟  
僊種世傳工益壽飽嘗端勝衛生經

蜜咭誰數楚江萍枉道偷桃是歲星長夏日烘憐國色  
去年霜薄赦秋刑侯堂舊許祠南海使驛曾勞走北溟  
名種尚堪重品第未甘陸羽著茶經

脩竹繁陰覆綠萍壓牆朱實鬪星星明珠落掌驪龍睡  
丹殼歸盤白馬刑曾指畫圖誇北客至今漬蜜動南溟  
可憐傖父流涎久何日烏山始一經

一時紅紫逐飄萍風雨殘枝尚綴星西國葡萄甘僕隸  
白家躑躅強儀刑誰移僊種從丹府不使靈芽遍八溟

大業豪華今寂寞佳名空著海山經

寄林謙之 光朝

冰壺玉塵逼人寒忽漫過逢豁肺肝千載有人扶古道  
一時傾蓋盡儒冠不妨我輩詩腸在要取他年酒量寬  
萬卷白頭成底事販屠之輩任艱難

方次雲伏枕久不入城獨宿知稼堂有懷

吹笛清宵何處聲隔窓斜月聽人行夢回案上青熒火  
魂斷城頭長短更三伏故人憐卧病百年薄宦任浮生

春風尚憶茅堂話相對哦詩天未明

贈日者黃明遠

幅巾別我五周星今日相逢眼暫明一第男兒身自致  
曾將蹤跡問君平

迂泉守晚宿囊山

山木轉斜暉秋風動客衣露華侵坐冷星宿傍簷稀樓  
迥鐘聲隱更長燭影微年來倦奔走早覺利名非

慈竹

慈竹陰初合新梢翠欲流晚搖千尺影冷撼一堂秋  
筍迸苔痕折葉蒙山色幽鳳凰棲息穩端為此君留

返照

返照隱西山烟村一水間路長人自急林暮鳥知還  
楓巷秋長掃蓬門夜不關風塵猶劇盜歲月但催顏

倚薄

茅簷供倚薄藜杖費扶攜天入平蕪濶山含宿靄低  
樹聲風便旋野色晚淒迷容易營生事秋田稻欲齊

迂楊守宿九峰

木落關山暮雲深野寺秋寒花空照眼濁酒不禁愁官  
拙羞奔走時危且滯留迴廊供徙倚萬慮寄冥搜

偕方次雲錢孫守月下同歸戲成

北陌爭迎丞相車南郡新分刺史符弩矢紛紛夾道趨  
旌旗獵獵照通衢一時冠蓋事奔走車馬不許停斯須  
賢愚貴賤俱物役始覺名利真區區我亦年來忝簪紱  
苛禮羈人日湮汨往來叨沐主人恩陶母不吝千金髮

平明聯轡逐西風  
歸路三更踏明月  
解貂野店貰濁酒  
醉罷高譚偃溟渤  
風塵薄宦君勿悲  
猶勝低回場屋時  
烏帽白袍青竹榻  
短檠終夜照紅蠟

奉別王宰先之

畫角城頭繞怨音  
秋風握手別杯深  
三年故國相從地  
萬里青雲欲別心  
醉罷林霜催菊老  
夢回江月轉棠陰  
預愁曉色離亭外  
衰草撩人思不禁

醉中別李元泰

宇

同雲幕幕暗前山急雨颼颼釀小寒  
桃花欲開尚羞澁  
梅梢已老半闌珊  
話別一尊休草草  
丈夫相識期歲老  
綈袍萬一未忘情  
春風莫惜歸來早

和陳應求春日見寄

滿目繁春事題詩寄所思  
輕寒欺酒力宿雨褪花姿  
經世知無術追歡要及時  
郊原曠晴景莫負去年期

和余子美春日緩步

道屈時危且茹藜不妨去魯儘遲遲  
一軒容膝分藍宇

十里携筇闢麥岐杜老皓頭真可惜陶潛知命更奚疑  
干戈淮上無消息愁絕南山獨步時

山行即事二首

落石奔沙岸頽雲擁樹根牛羊千古道雞犬數家村風  
遞隣春急春歸農事繁生涯隨處樂翁嫗話柴門

席改尊猶在心間屐自遲角巾歌短樹風帶冑疎籬作  
難憂強敵全生混野麋晚來幽意愜歸路恐多岐

宿鷺峰菴題壁兼呈林字卿

桴諸友

抱被招提聽晚鐘  
昔遊回首七春風  
斬新花木軒窗外  
依舊樓臺烟靄中  
永夜篝燈元自照  
故人尊酒偶然同  
明年此日看騰踏  
先數班揚賦律工

和龔實之

茂良

聞戎人敗盟

請纓未快終軍志  
置火湏然董卓臍  
列郡奔馳喧羽檄  
聖朝哀痛下芝泥  
盟寒關隴無來使  
春晚江淮有戰輦  
十載枕邊憂國泪  
不堪幽夢破晨雞

和宋永兄春日閒居

負郭濃春事高齋闕曉關晴雲浮越嶠芳草接荆蠻祿  
薄難長飽才微分久閒年華兵甲裏吁歎鏡中顏

喜雨

皇天嗇甘澤為農生理休哀哉桑麻瘁得意蓬蒿稠一  
夜溜簷雨曉屋喧鳴鳩驚濤注空壑秀色溢平疇田舍  
無宿儲及此寬百憂陌上誰家郎惟恐阻春遊

偕徐子由余子侯陳應求游虎丘巖偶題壁韻

叶因分字聯句

一室函滄海羣公半列侯余放懷追許謝洗耳笑巢由

徐

花暖蜂相趁泥香燕自求陳杖藜窮勝境染筆記春

遊黃

題翠峰寺西軒

寂寂春葩映短牆半山松竹奏笙簧無情幽鳥背人去  
不慣村童笑容狂

送龔實之赴官南安十韻

氣合論文地魂銷惜別筵離亭芳草外飛蓋落花前北

關舊通籍南州先著鞭卻詵丹桂早萊子綵衣鮮側耳  
聆佳政成名及妙年因風能見憶得句會須傳筮仕聊  
棲棘駑才阻泛蓮交情期歲晚會面數秋天背水浮春  
樹桐城際暮烟龔黃真忝竊末路共騰騫

暮春山間

緩步春山春日長流鶯不語燕飛忙  
桃花落處無人見濯手惟聞澗水香

閒居

一水遠能白羣山陰更青靜憐風細細閒任雨冥冥春色供多病時情畏獨醒平生憂國意客至問朝廷

次韻余子侯遊石泉

竹杖櫟鞋意自便蘚牆莎徑色相鮮平疇漲麥雲連海絕壁蟠松蓋倚天竟日虎巖延眺矚何時蟹井費攀緣歸來幽獨不成寢山月侵廊鐘韻圓

秋日晚晴懷南山舊遊

霽色孤城外秋聲獨樹邊烟雲澄遠嶼風月渺平川戎

馬休何日登臨憶去年  
吾曹得踈放醉墨灑層巔

寄方次雲

近有清源信官期報早秋時  
危從薄宦情在惜同遊簪笏  
趨新幕  
琴書別故邱  
君能訪茅宇  
尊酒話離愁

悲秋

萬里西風入晚扉  
高齋悵望獨移時  
迢迢別浦帆雙去  
漠漠平蕪天四垂  
雨意欲晴山鳥樂  
寒聲初到井梧知  
丈夫感慨關時事  
不學楚人兒女悲

和鄭叔友厚題真如

南郡趨新幕微官媿野人客懷投寺晚歸夢到家頻  
歲月看蓬鬢塵埃聽葛巾相隨一杯酒且慰百年身

和方次雲至日作

至日空相憶何時復此來素書煩蠟炬往事付寒杯  
夢破風驚竹詩成雨綻梅江城低婺女回首亦勞哉

上汪內相藻生日

天意恢炎歷星躔降昴精典刑存大雅領袖屬名卿  
出

入三朝舊青冥萬里程磨鉛周太史視草漢承明詞采  
令宗匠艱危急老成遽旒方側席高燾尚專城卜築祁  
陽外懸弧晉水清先君桃李蔭比屋袴襦聲畫永黃堂  
夢春晴綠野耕日邊稽召節幙下及稱觥盛業期伊呂  
脩齡頌老彭一麾難久借四海欲休兵

送鄭察推叔友罷官之潮陽二首

官達身何補才名陸未沉不妨吾道在休較吏文深城  
郭春將暮風雲晚更陰相看炎海闊魂斷欲分襟

春草故人去落花離緒多芙蓉少顏色薏苡盡風波塵  
土非長策功名一醉歌周南暫留滯莫改歲寒柯

和蔡司法

賞

南安之什

一夜晴風吹曉霞平明聯轡踏飛花嵐光且對聖賢酒  
世事僅同蠻觸蝸簿領迷人春易老漁樵滿地畫無譁  
登臨未飽溪山興歸路星星月照沙

春雨中會西山佛迹

自喜平生山水心公餘猶及此登臨雲埋古寺鐘聲遠

花落空村烟雨深是處芳尊追勝槩幾人寒勒度疎林  
都無春色一分在況有塵寰萬慮侵

陳晉江以壬戌四月上澣宴同僚于二公亭

百年遺址俯郊垆十里蒼波帶古亭隔岸樓臺春去遠  
滿湖烟雨酒微醒苔碑缺落庭松老野鳥去來汀草青  
風物不殊天竺路扁舟髣髴舊曾經

越十日陪使君汪內翰復來

雅製初仍舊佳名留至今城依刺桐古亭入芟荷深尊

祖賓僚集旌麾刺史臨自公多暇日及此豁塵襟

再別鄭叔友兼寄方次雲

鞍馬侵三伏萍蓬寄一身及秋歸計早到日附書頻炎  
嶺休長客清漳有故人過逢如問信為道各埃塵

三月三十日郊外即事

雨積稻畦白晴添麥隴黃野橋排鴈齒山路轉羊腸鳥  
語有時好田家隨事忙一年春盡日身迹更他鄉

夜坐梅樹下率爾

羌吹宣重籥胡床近小臺  
輕輕雲片度淡淡月華開  
壁暗雨留蘚庭虛風落梅  
納涼公宇邃清夜興悠哉

和汪端中陪府君遊東湖

漢家虎璽重分銅鑾坡厭直  
金蓮紅海角瘡痍煩大手  
循良不媿古人風偃蹇霜風  
鈴閣寂蒙茸春色園扉空  
為郡風流見前輩隙日車蓋  
飛城東鰲首虛亭未泯滅  
騷人古意無終窮香風十里  
菰蒲外喜氣一城尊俎中  
中原景物久荊棘南渡衣冠  
隨梗蓬此地龜文符古識

盛觀略與承平同腐儒謬忝無雙裔聲價遠慙吾祖童  
青衫幕府困奔走賴有新詩為發聾

晚自東湖攜藕花歸兒輩爭插盆池香艷不歇  
亦供兩日嗅翫因成

恠底兒童無遠圖埋盆注水插芙蕖人心不作非真想  
便覺東湖入座隅

壬戌中秋泂檄行縣與龔實之同宿于琴泉軒  
搖落江城暮招提訪舊遊泉聲終夜雨竹影一堂秋露

湛衣裳冷山空枕簟幽故人憐寂寞抱被肯相投

實之有詩復次其韻

鞅掌從王事招邀媿主人彈琴秋葉落聽雨夜床親  
歲月何妨紀詩篇莫厭頻要令千載下不但數姜秦

早發延福道間偶作錄呈

夜宿姜峰寺曉投劉店村秋光隨杖屨逸興滿郊原  
短句時時得何人細細論鳳凰山下約回首欲飛翻

陪實之登姜峰絕頂鐫石

抱琴歷高峰拂石就晚陰空山對搖落懷哉千古心

鄭山鋪用實之韻

一溪清淺抱山根山霧溪烟白晝昏負郭可能無五斗  
肩輿何事走空村

晚泊桃源驛奉懷幕府諸公

鞍馬泊孤亭人烟接古城半村留晚照萬壑送秋聲風  
月思玄度文章媿長卿桃源何處在山驛至今名

秋旱熱甚尤苦登陟輿中戲成

少皞不用事八月猶苦熱南方本炎蒸况乃甘澤闕雨  
師弛厥職旱魃逞餘孽金石鑠欲流汙池龜甲裂稼穡  
亦已休田家生理絕敢意築場圃漸聞罌瓶竭租歛數  
有恒不為愆陽輟州縣急鎔銖鞭箠動流血吁嗟號帝  
閭此語何由徹空村巫覡舞靈祠香火謁水旱制於天  
祈禳恐虛設嘗聞桑林禱爪犧亦清潔萬國幾為魚鳧  
德豈其劣但令備先具難必沴氣滅江淮十萬兵仰口  
資餽輟太倉無宿儲有司憂百結腐儒從薄宦籃輿走

嵒嶽王事有嚴程亭午不得歇林鳥呀無聲僕夫屢告  
暘馬得變玄冬陰厓踏層雪

宿齊雲寺

行李秋將老停鞭日已西深村見人少孤寺與雲齊試  
問霑微祿何如返故棲雞鳴不成寢乘月下清溪

題鳳凰寺

一代衣冠霸業休半山金碧梵宮留傷心廢宅松榆老  
滿目寒塘茁茁秋馬鬣未平餘葬地蛾眉不見但粧樓

憑高欲問豪華事者舊無人僧白頭

鳳凰夜坐聯句

月黑前村笛風清俯檻琴老苔虛殿閉喬木故宮深宿  
鳥依叢樹疎鐘出斷林夜堂留暑濕秋谷半晴陰事業  
惟歎枕塵埃一散襟勞生倦奔走遠目寄登臨割據當  
年事英雄萬古心青山空白骨華屋漫黃金酒薄何勞  
醉詩成不廢吟艱危多感慨時序苦侵尋

題涼峰

倚杖清秋遠彈琴白晝長  
笙簫離館廢雲木晚風涼  
往事空流水歸心滿夕陽  
相逢惜分手珍重故人觴

題雲臺寺

西風城郭尚炎威  
竟日琴尊歷翠微  
紅盡秋林楓正落  
涼生晚寺雨初飛  
相從歲月交情舊  
此去塵埃會面稀  
往事惟餘故侯塚  
白楊衰草露霑衣

聞太母還輿喜極成歌

嗚呼禍變稔前朝  
都城千雉摧天驕  
翠華北征沙漠遙

六宮萬里從翬綸我皇龍飛守宗祧周宣漢武見今朝  
問安眎膳阻夙宵位極萬乘心何聊大哉聖孝回天眷  
萬類革心非革面天邊驛騎急星電傳報駟興涉淮甸  
小臣喜極手欲抃乾坤一夜歡聲遍遙想千官會星弁  
拜舞稱觴長樂殿

題大盈驛壁 六言

西風落莫空館暮色迷蒙遠  
家近不妨酒盡夜寒陡怯  
衣單

和李元泰宇艷歌

涼風愜人如故舊客燕殘蟬度清晝搖落三秋楚澤悲  
相思一夜東陽瘦愁連黛入眉山重猶憶去年和泪送  
魚沉鴈斷消息稀頻來惟有清宵夢

擬上張丞相魏公

五閨干戈極炎暉歷數新析圭綿六服卜鼎邁千春哀  
痛朝姦稔黃緣國步屯近畿橫彗孛嚴禁失鈎陳魏絳  
謀和敵包胥日哭秦翠華旋北狩清蹕且南巡霧塞紛

銅馬祥開表玉麟官軍推大弟耆老赴仁人唐祚興靈  
武昭王問水濱悲纏刀斗急警報羽書頻闕輔騰驕子  
朝廷倚大臣夢符巖肖說天祐岳生申濯濯襟靈邁溫  
溫德業純家聲真不墜廟略信如神行潔圭無玷心堅  
竹有筠蒼生出塗炭黃屋待經綸蘇峻稱兵日姬公復  
辟辰祚危旒在綴主辱涕盈巾諸將趨行殿孤軍入帝  
闈乾坤收淑氣淮海霽煙塵尊俎辭樞極旌旄下蜀岷  
霜稜函谷外春色錦江瀕流馬通飛漕推鋒截要津榮

親萬鍾祿許國百年身盛烈刊彝鼎丹忠薄昊旻流言  
初抵隙積毀竟排真感激回天眷須臾秉國鈞精神千  
載會霖雨八方均曉几趨環佩朝班領搢紳荆蠻淹月  
定戎騎暮年馴奉詔移甌越承恩拜紫宸地遙分虎節  
日暖想龍鱗潁上歸黃霸河間借寇恂台衡期必復風  
俗再還淳嘆惜寒門士叨陪上國賓雕虫慙小技連蹇  
分長貧短劍秋仍撫殘燈夜更親曳裾胡不可投璧懼  
無因海運鵬孤翥泥蟠蠖未伸濟時公努力宇宙久荆

榛

惜別行送林梅卿大鵬赴闕

刺桐城邊桐葉飛  
刺桐城外行人稀  
客來別我有所適  
問客此去何當歸  
林卿妙齡才秀發  
胸中萬卷涵溟渤  
家聲合沓蓋九州  
里第嶙峋表雙闕  
竭來試吏天南方  
驥繫馬能騁所長  
梅僊脫身東市卒  
杜老落筆中書堂  
傳道淮壖減豺虎  
政須禮樂事明主  
之子軒軒霄漢姿  
好向春風刷毛羽

送汪內相移鎮宣城

龍紀膺圖代龜書出洛年  
人文初炳煥神化共回旋  
大雅藩籬缺諸儒門戶專  
天將扶古道嶽始降名賢  
派別軒皇遠江回楚邑偏  
英靈久蟠鬱簪笏舊蟬聯  
家學傳桑硯詞場著祖鞭  
風雲千載會宇宙大名懸  
行潔圭無玷才長桶有挺  
西都經術富東閣道山連  
壺簡煩紬繹羣書益貫穿  
才超班馬上道探老莊玄  
近代風騷變詞人霧縠鮮  
俳優驚異體輕薄竟相沿  
作者令亡矣明公

獨免旃狂瀾資反正墜緒得扶顛內史趨欄藥中書落  
筆椽直詞批勅尾清議列龜前法駕南巡日塵氛北刺  
天新亭空涕洟神汴失鈴鍵慰將言彌切徵兵檄屢宣  
奉天憑陸贄淮上困苻堅素祕龍韜策爰叅虎旅權精  
誠潛貫日勲業合凌烟耆舊朝廷倚文章海內傳三長  
青史筆五典白麻篇思贍宮人蠟榮歸御榻蓮研經魚  
辨魯揮翰驥奔泉方俟金鑾作聊從銅虎遷瘡痕承帝  
念愷悌沃民編鈴索畫齋永棠陰夜月圓豐登諸縣樂

治最八州先詔易宣城郡恩遺晉水壩歌襦恐來暮卧  
轍惜言還漢守終丞相黃公且潁川長亭春草外巨鎮  
日華邊况復師瞻久由來德望全芝函行召對鼎席即  
詳延尚父西辭渭司徒北破燕斯民免塗炭吾黨賴陶  
甄竹尺元通籍瓜時忝備員狹提曾識面父執絕隨肩  
被遇憐才小懷恩覺體孱塵埃餘冗吏情緒足離筵歌  
闕魂飛渚詩成淚染牋轅駒何局促巫步失躋躔舊治  
應騎竹他邦未暖氍公歸勞驛騎地遠想台躔處士依

文舉賢臣頌子淵瀛州如許到未敢卜歸田

九日

天涯霜露羈離久海內風塵歸思賒萬里窮途雙白鬢  
一尊濁酒對黃花頻年奔走哀王粲落日登臨憶孟嘉  
絕塞歡娛易蕭瑟悲來忍泪望京華

還家

黎明呼羸僮拄策渡野水輕嵐翳初日古道步平砥麥  
隴黃四出松竹翠相倚人間春告盡巖色秀未已眼入

故鄉明語還親舊喜印非朱買臣金無蘇季子竊笑免  
妻孥相過動隣里富貴豈吾謀薄游聊爾耳

早發東城迂憲車

五更驅倦僕發軔古城邊月色潮初上鐘聲人正眠自  
憐筋力在無補歲時遷遠媿陶彭澤歸心獨浩然

暮春宴東園方良翰喜有詩入夏追和

要洗襟懷萬斛埃一尊相屬莫遲回顛狂柳絮將春去  
排比荷花刺水開懶矣宦情甘冗長拙於句法強追陪

人生行樂須閒健千古朱顏同一類

自法石早歸

避暑寓祇園黎明度遠村桑麻迷杜曲雞犬散桃源  
草細將合溪流深不喧幽懷未能愜城郭已朝暾

和南安余宰題翠陰亭致爽軒二首

溪光山色兩幽深更結新亭倚翠林老木參天烟漠漠  
虛簷掛日影沉沉三年此地留喬鳥六月涼風颭楚襟  
趨取公餘急行樂人生容易二毛侵

面勢揖孤峙交柯藏伯勞日臨公館寂人與此軒高對  
酒屢中聖題詩應僕騷喬林思舊隱咫尺聽風號

癸亥秋行縣夜寓下生院倦甚慨然有歸歎之

興戲用壁間韻以盟泉石

何須輪擁朱不願佩懸玉青山得去且歸去謀生待足  
何時足林間招提金碧開門外過客誰能來桂花落盡  
無人問古墻秋逕生青苔舊山泉石故應好菟裘不營  
亦可老此身已與三徑期未分淵明迹如掃

晚泊同安林明府攜酒相過戲集杜陵句為醉

歌行

疾風吹塵暗河縣去馬來牛不復辨黃昏始扣主人門  
置酒張燈促華饌夜如何其初促膝人生會合難再得  
簿書何急來相仍且將款曲終今夕腐儒衰晚謬通籍  
射策君門期第一天門日射黃金榜自恠一日聲輝赫  
三年奔走空皮骨足繭荒山轉愁疾未有涓埃答聖朝  
途窮反遭俗眼白懷抱何時得好開生前相遇且銜杯

儒術於我何有哉黃帽青鞋歸去來

賀呂守用中

紫帽山顛秋色高刺桐城頭風怒號乾坤冲融忽異態  
千里和氣生旌旄昂星之精來瑞世要令致主唐虞際  
骨相誕鍾嵩嶽靈風流不泯碯溪裔懷香握蘭今幾春  
瑣闥畫省曾彌綸他年攬轡探禹穴平反所活凡千人  
南土分憂寬主顧棠陰好在來何暮儒風郁郁蜀文翁  
德量汪汪黃叔度相種由來多山東蟬聯八葉屬我公

百年耆舊謳歌裡萬里山河拍顧中  
聲名合沓蓋九州人物中興第一流  
風雲變化固有待蒼虬寧許池中留  
青衫腐儒趨幙府香火祝公如衛武  
夾輔皇家不計年長將朽質入陶甄

題定光寺

與洵姪期集

為憐山色好百里赴幽期  
疊嶂生寒早脩林出日遲  
年華空晚晚時事竟艱危  
咫尺故園在題詩有所思

思歸

醉眼乾坤大歸心日夜長風霜歲云暮塵土鬢成蒼俗  
物猶能在危機只自防可無田種秫三徑未宜荒

張雲翔搏采蘭堂

丈夫貴成名人子重養志志養非鼎食名成要身致世  
上萬男兒二者少稱遂樂哉張公子此事有餘地昔我  
遊武林始與張君值津津紫芝眉落落青雲器驂騑步  
康衢鵬鷖騰秋翅一官天南州艱難已嘗試悠然望白  
雲歸來為隱吏軒裳非吾心菽水重親意築堂九畹邊

遠取南陔義膳羞務馨潔晨夕必躬眎老人嗜國香幽  
懷時一寄春風敷柔絲色與恩袍類不效荆楚俗紉之  
為佩璲不學會稽亭徒然脩禊事願言倚玉樹同作庭  
階瑞他年粉署握永伴萊衣戲

次韻陳宜中

豐

攜詩見訪

朝來乾鵲噪簷牙昨夜燈開送喜花好事寧期貴公子  
攜詩肯訪野人家客愁到此逢寒食薄宦羈人屢歲華  
載酒他年問奇字故園歸去老桑麻

別方良翰

海上曾聞屬國歸，歸來依舊壯心違。  
風塵萬里長為客，管庫三年不救饑。  
尊酒欲謀良夜醉，庭花故就別時飛。  
看君好刷冲天翼，莫遣江城過鴈稀。

題詩口鋪

一水曳脩帶千山，羅峻屏客懷今古。  
汨人世短長亭歲，月身將老功名夢未醒。  
長卿倦遊久歸思，滿巖局。

過白衣莊

草樹天邊碧溪流雨外渾僕夫經燕岫筋力盡龍門斜  
日當幽徑輕風度晚村築塲茅屋底約畧似東屯

題化度寺竹間亭

羸驂踏遍亂山青薄宦羈人醉未醒破午停鞭得幽寺  
眼明初見竹間亭

行安溪道中

雞豚殆盡官軍過豺虎猶存野老愁萬一皇恩更寬大  
會令戈甲變耒耜

道間即事

花枝已盡鶯將老  
桑葉漸稀蠶欲眠  
半濕半晴梅雨道  
乍寒乍暖麥秋天  
村壚沽酒誰能擇  
郵壁題詩盡偶然  
方寸怡怡無一事  
簷裘糲食地行僊

別呂守三首

家世唐蕭瑀  
風流晉謝安  
胸中畜邱壑  
筆下雷波瀾  
舊謳歌惜賓  
僚禮數寬龔  
黃初報政  
飛詔忽江干

自此調元去  
人今卧轍同  
棠陰閩嶺外  
星傳浙江東  
四

月黃梅雨千山荔子風離亭獨歸處回首意無窮  
涉獵媿醇儒南州入幕初力疲三尺法塵滿一床書不  
有劉寬恕何堪阮籍踈才微甘冗長感激辱吹噓

白沙夜聞灘聲

錯認松風萬壑傳又如急雨碎池蓮青燈孤館元無寐  
況復溪聲到枕邊

大水二首

巨浸滔天後遺黎復業初桑田皆變海老稚半為魚鑿

石開新道行人問故廬客愁那對此搔首重欷歔  
澤水應垂傲高穹豈不仁發陳遵故事執咎定何人  
岸落溪容改山摧土色新傷心問耆舊誰與弔斯民

題分水嶺兩絕

嗚咽泉流萬仞峯斷腸從此各西東誰知不作多時別  
依舊相逢滄海中

閩越江南此地分鮑娘詩句尚能存客懷未覺今宵好  
家住壺山烟雨村

題崇安驛

聽美生憎曉色催丹心自媿未能灰塵埃汨汨歲將暮  
霜霧濛濛晝不開身外百端俱長物時危萬事入羈懷  
君恩早晚粗酬了糲飯敝裘歸去來

題紫溪驛

離家一月斷家書家在閩山深處居路入江南隔分水  
山猶不見况吾廬

至日戲題天福寺

去年至日老夫家呼兒具酒對梅花今年至日空奔走  
豈止無花亦無酒薄宦驅人無已時客懷牢落強裁詩  
君不見杜陵老詩伯年年至日長為客

至日題江山驛

客裏萍蓬媿此身天涯風俗對茲辰雲容山意商量雪  
梅蕾葭灰漏洩春歲晚旅懷元自惡夜長歸夢為誰頻  
遙憐兒女團圞處應念江山飄泊人

上陸鹽生辰五首

拂拂秋風生桂枝于門何日誕英奇  
請看素魄初圓夜正是奎星呈瑞時

高議曾匡馬上翁聲名凜凜尉佗宮  
誰知千載經行地猶有雲來紹祖風

嘉謨合補三公衮餘事聊分八使車  
想得忠勤徹旒冕天涯洗眼看徵書

名家詩禮有諸郎飛入南宮鴻雁行  
不向人前稱閥閱要須僊桂五枝芳

可但人間五福全  
飄飄真是地行僊  
摩娑銅狄成追憶  
游戲塵寰五百年

和泉上人

芒鞋踏遍萬山松  
得得歸來丈室中  
破衲一身在懸磬  
清談對客似撞鐘  
名家要看驚人舉  
覓句何須效我窮  
春雨地爐分半坐  
便疑身住古禪叢

進元會詩

昭代干戈戢炎輝  
厯數長蒼生久蘇  
息寰海屢豐穰社

稷基新命朝廷舉舊章太平周禮樂垂拱舜衣裳拜壽  
先長樂傳聲出未央冕旒端黼座儀物備明堂閭闔星  
辰外旂常日月旁天顏春穆穆雲物曉蒼蒼雪色殘鳩  
鵲韶音雜鳳凰嚴宸分羽衛荒服走梯航人正令行夏  
民心舊戴商觀光環萬國班朔首三陽列辟鑾聲噦羣  
工玉珮鏘奉常陳雅奏太史報殊祥於穆前朝盛丕承  
奕世昌版圖還大禹風俗再陶唐已格無為治猶懷不  
敢康幾年脩縟典今日付吾皇所願終寅畏無忘每贊

襄明良相際會長奉萬年觴

除夜

暮景流年速寒燈照夜長艱危仍薄宦時序更他鄉雪  
暗吳宮下春歸越嶠傍明朝對佳節無處覓椒觴

元日次良翰韻

老去低徊強北遊春來消息望南州別離况復年華換  
富貴難令少壯留行李未知何處定屠蘇還解憶人不  
可堪一夜寒江雨滴作羈懷萬斛愁

題方民瞻愷草堂

結宇囂塵外，寓形天地間。  
幽懷付松菊，高卧對雲山。  
門巷來人少，琴書竟日閒。  
可憐朝市客，名利老朱顏。

和詠陳賢良華表

千年鶴表映溪濱，一代鴻文動至尊。  
仕路低徊唐老杜，才名合沓漢公孫。  
家風不減太邱令，盛事何如道德門。  
肯把浮榮銜流俗，欲遺典則到仍昆。

試院中蒙相君惠茶和錢教授韻

誤向文闈齒搢紳相君分賜壑源春窮搽千卷非吾事  
滿引一杯如故人無復睡魔能偃蹇敢將詩律鬪清新  
西湖好趁清明約泉活涓涓火不陳

將放榜用錢韻

銀袍健筆落雲烟入眼高文墨尚鮮隱隱蟬聲桑葉下  
看看鵲立棘園前空階夜響催詩雨平地雷轟造榜天  
是日大雷試問西湖好風景何如華屋艷神僊

雨後陪省中諸公游竹閣

紅盡桃初實青濃柳欲花春歸人迹少山遠市聲譁空

有前朝樹

閣前有枯枿相傳謂陳朝樹

難尋處士家

處士謂林逋

登臨多

感慨況復客天涯

將歸

北首寒猶淺南轅暑正深馬蹄長道路鹿性本山林客至能相勉愁來可獨禁功名竟何物造化久冥心

離臨安

細雨出江城潮回江正清未能捐俗累不敢憚嚴程落

日行人少空山獨鳥鳴離愁似春草觸處便能生

題須江驛詩後

歸來已負百花期閒拂塵埃看舊詩極目平蕪二千里  
鄉心惟有杜鵑知

題白沙鋪

負郭可無三頃秫蓋頭幸有兩間茅還鄉且盡田家樂  
舉世誰非市道交村酒一杯澆磊塊山程數驛更磽嶮  
羸驂莫恠歸鞭急心在輕紅荔子梢

和超然翁韻二首

才微祇合老荆扉，悞竊虛名及盛時。  
藜杖端須為劉燭，匏茅聊復預齊吹。  
亨衢騰蹕非吾事，客路逢迎仰已知。  
莫訝歸程秋向晚，也應去魯自遲遲。

西風回首故鄉情，何日為園學邵平。  
已辦孤帆衝夕浪，可堪萬壑更秋聲。  
折腰為米追時輩，當面輸心媿老成。  
飲罷歸來未能寢，微吟擁鼻數寒更。

不見

碧湘幽夢秋帷冷玉滴宵壺聲耿耿平生不作等閒愁  
風月故人長引領青樓花開歡正新當時握手欲留春  
樓空花落春竟去惟有紗窓鎖暗塵風流回首年華晚  
愁與宮眉添宛轉不堪翠袖裒殘香六曲屏山為誰展

御賜閣額二首

傑閣侵霄漢宸章煥壁奎內庭頒寶宴中使揭璇題信  
誓山河固厖恩雨露低寒儒倚天祿目斷五雲西

功掩蕭何第名超崔氏堂孤忠扶社稷一德契穹蒼金

碧飛翬外鸞虬結綺傍落成紛賀燕弱羽得高翔

西湖會同年和巫子先

韻 時子先以臺制不赴坐

一鷗獨立鳥羣空寂寞誰憐漢閣雄鴈塔他年曾接武  
烏臺今日自生風平湖入座搖寒碧返照催人墮晚紅  
目斷禁城驄馬客何時譚笑一尊同

黃憲生朝三首

國勢巍巍盛時髦衮衮生雲師綿世胄漢相舊家聲學  
海波瀾闊神峰冰雪清天涯逢誕日目極曲江城

經術賢闕望許謨帝席前詞場聲擲地憲府力回天金  
鑑風流在炎暵雨露偏慙懃理歸楫早覲日華邊

陰德千人活霜威五嶺寒三持使者節一著惠文冠臺  
省班聯忝賓僚禮數寬微官慙束縛稱壽阻門闌

送陳應求赴官

莫辭酒且聽歌休被驪駒白玉珂主人勸客終今夕明  
日長亭可奈何金風蕭蕭塵餘熱砌蟲唧唧助淒切此  
時景物不勝愁況是離人心欲折陳侯陳侯貌巖巖而

俊整才浩浩而清絕有如壺山之萬仞巔  
翫壽水之千尋瑩澈青芝赤箭藥籠儲金  
鐘大鏞廊廟須天生奇才為時出容易棄  
擲天南隅君不見馬賓王新豐一逆旅  
又不見公孫弘菑川一老儒逢辰立譚  
取卿相至今文采照天衢廣文官舍雖落  
莫刀筆不與俗吏俱公餘更勤五車讀  
未必不是北門西掖之權輿刺桐古城  
花欲燃舊遊人物想依然憑君到彼訪  
二陸向道故人飽飯度殘年

送弟童士季赴永春

贈君以宣城秋兔之穎佩君以嶧陽焦尾之琴餞君以  
顯父清壺之酒送君以安仁金谷之吟筆傳洙泗之正  
印琴彈單父之遺音酒以陶百里醇醲之化詩以寫一  
時離別之心門前車馬氣駸駸黃葉飛翻秋正深風雨  
對床連夜語江山異地欲分襟憶昔聯名唱行殿一日  
聲華九垓遍自知無用甘林泉君亦何為尚州縣君今  
未用嘆滯留丈夫勲業要晚收信臣千載循吏傳家令

當年褒德侯高才所莅無全牛民自不冤吏早休倘免  
誅求急星火行看寇盜盡鋤耰

無題

雞蟲底處覓得失鳬鶴無心較短長醫國未能三折臂  
憂時空費九回腸

送外兄方卿公美

廷實赴廣東憲十絕

九重仁聖不忘遠庶獄哀矜軫慮深本恕定知黃霸用  
無刑端契有虞心

遐陬赤子困侵牟跳弄潢池今幾秋從此聲威懾強梗  
自然戈戟變鋤耰

石門酌水賦新詩舊事曾聞吳隱之習習清風化貪懦  
不圖今見古齊夷

親興昔侍角方總使節今持鬢未蒼竹馬兒童半相識  
分明遺愛在甘棠

早晚芝函下九天不容瓜戍更期年蒼生屬望為霖久  
肯使炎方雨露偏

聞道韶陽一畝宮  
居民奉祀曲江公  
憑君到日酌尊酒  
醞藉風流事事同

惟底青雲嬾著鞭  
年來餘事覺真詮  
園扉晝闕庭無訟  
時訪曹溪六祖禪

千里江山一鴈聲  
廣文官舍冷如水  
祁奚若未忘公舉  
魏戊猶堪備內稱

新息功名晚始收  
送君今去跼鵞州  
男兒未上雲臺畫  
莫念平生馬少游

十里紅旗擁使星一杯綠蟻話長亭明朝車馬各南北  
誰唱陽關且細聽

和宋永兄罷官還家途中見寄四絕

三年惠政留巖邑千里歸舟犯惡灘烏鵲信傳知漸近  
白鷗盟在未應寒

流年忽忽雙蓬鬢薄宦紛紛一旅亭惟有長官衫色在  
至今猶與眼俱青

知稼堂中一味閒卷簾終日卧看山雖無微祿供貧病

幸有新詩伴往還

不比人心驚歲移且看鴈影逐春歸明朝已辦椒花頌  
相對一尊忘是非

送余子美歸淮上

恠底窮途遭白眼依然別酒對青春百年甘旨為貧計  
千里羈縲有故人道在不妨輕去魯功成他日會歸秦  
江淮若遇南飛翼尺素無忘東海濱

西郊步武地春將老矣不能一往朝吉姪今日

為遨頭澁雨大作非惟人心難并止或尼之  
枕上得小詩資宋永兄一喙因呈昔遊兄弟  
速尋舊盟勿為天公所玩

無復西郊訪綺羅任教佳景去如梭殘杯冷炙何曾夢  
亂絮飛花積漸多舉世盡從忙裏過幾人能共醉時歌  
不辭作意營春事急雨狂風可奈何

己巳九日陪陸使君宴共樂臺和莊倅韻

一年秋色垂垂老九日寒花處處同落帽何人羞短髮

危臺向晚易高風  
黃雲萬頃峰巒下  
白雪幾聲霄漢中  
陌上行人盡回首  
使君開宴在層空

和宋去華

藻

愛日樓之什

百里平疇一望間  
綠蕪盡處見青山  
孤雲自在開仍合  
白鳥羣飛去復還  
竟日茶瓜留客坐  
滿床圖史伴君閒  
攜醪許我問奇字  
剝啄何妨屢扣關

和宋永兄愛日樓見寄八首

畫圖展處千山雪  
漁艇歸時一笛風  
為愛東溟日色好

側身樓外望壺公

陳樓高卧真佳士陶徑歸來有古風只恐功名不相放  
驅人須作黑頭公

野意樓前滿秋聲樹杪回歲華行老矣午夢思悠哉碌  
碌甘捐棄時時幸往來不才詩有債多病酒為媒

醫手無三折愁腸漫九回宦情聊復爾世事轉艱哉狂  
態未能免新詩特地來從今罷歌舞焦尾聽無媒

軒組挽人力萬中無一回急流能退者捨我有誰哉此

意何時遂相攜歸去來東臯春雨足荷鍾聽鳩媒  
齟齬攜書冊成名天上回如公希世者自古幾人哉山  
藪詎宜去功名看鼎來人間無伯樂相馬失龍媒

秋心驚杵急遠目見潮回哀日可愛也楚風真快哉卷  
開前聖對竹動故人來去魯遲休恠謀身恥自媒

山林往不返朝市去無回能樂窮通者真知出處哉次  
山稱漫仕彭澤賦歸來堪笑脅肩子相從不待媒

和使君邵農之什

五馬仰農遠過宗丈貳車興詠遍屬郡僚顧  
小子狂斐之章當詩人麗則之賦鵠未成而  
類驚狗不足以續貂燕類可羞斤削是望

交情自許膠投漆賓主相輝壁與琨賣劍早書循吏傳  
種瓜時問故侯園百年耆舊須親訪千里耕桑戴上恩  
一郡風流古來少筆端珠玉富歸軒

三瑞堂陸守

機雲二子才孤標妙齡馳聲典午朝今見遠孫來海嶠

儒雅雍容飾漢條德化醇醲春有脚天姿粹美玉不彫  
無復犢牛充帶佩坐令襦袴成歌謠蘊藉斯人合臺閣  
暫把一麾亦不惡鈴閣正午槐陰清訟庭無人鳥聲樂  
政成瑞應一何多天香國艷駢花萼可但漁陽頌麥岐  
會見西京紀神爵吾聞作善天降祥拭目泥封下建章  
一時文采七閩郡千載風流三瑞堂坤珍效祉來未央  
九莖怒芽抽且長胡不圖之獻天子播在樂府歌芝房  
庚午秋觀進士入試

棘扉曉闢萬袍趨鄒魯雖微士所都三獻有人懷楚璞  
濫吹何事試齊芋要令瘦語題壺白莫把元文覆醬瓿  
鄉人以黜  
卷暮酒袖手傍觀君勿恠箇中曾是老於菟

次韻宋永凡白髮

銀鬢詎如許金丹奈若何休垂髀肉涕莫擊唾壺歌世  
事奕棋局人材在沚莪未須相料理大器晚成多

回文絕句

歌闌一尊清晝長曲池小景晚風涼波微動處見魚戲

荷半開時過雨香

贈炊僮

雞唱度纔三羸僮井臼探缺瓶分曉月古竈湧晴嵐口  
腹真吾累庖廚賴爾堪支離不耕者對案敢無慙

和蘇伯承題恂恂軒

可但溫恭九族敦平生鄉黨更恂恂山林得趣身長健  
門館無私物自春一室琴尊對咸籍百年膠漆付雷陳  
共傳宅相工題品未數東坡德有鄰

春日書懷

才薄難任家國憂，年衰未免稻粱謀。  
權門雖好羞搖尾，世路多猜敢轉喉。  
是處溪山可藏拙，何人庭院許尋幽。  
便須火急營春事，九十韶光一半休。

次韻宋永兄春日放言寄秉彝

端廣文兄

君不見見邊孝先，才得午枕一覺眠。  
便遭弟子嘲便便，又不見馬季長橫經高堂坐。  
絳帳背後女樂盈，妖妍青春一去少。  
者老白髮不分愚與賢，試看刻苦要稱天下士。

何如落魄且作地行仙東風來習習新月照娟娟若逢  
花解語須用酒為年

唱和盈軸而燕集未期小詩請廣文兄為遨頭  
煩君管領東君手收拾風光尊俎中與作遨頭共春燕  
何須擁鼻學秋蟲誰憐老子興不淺自笑窮人詩轉工  
趁取身閒酒價賤明年此日又西東

宋永兄見和春懷再賦仍約秉彝兄尋春西郊  
朱轂常懷蹉跎憂華門長苦斗升謀此生幸不貧到骨

未死何妨酒入喉  
北里人隨春漸老  
西郊地與興俱幽  
憑君更語廣文叟  
飯足還須醉始休

宋永兄一訪青帝而黃婆作惡累日戲作小詩

問安二首

鳴鐘伐鼓南山阿  
傾城車馬相戛摩  
萬釭高下照朱碧  
百堵往來紛綺羅  
身入醉鄉頽紅玉  
月明歸路湛金波  
挽君一出卧三日  
奈此陌上春光何

陌上春光遽如許  
花落花開任風雨  
誰憐四印居士賢

苦遭造化小兒侮古來醫手罕折肱老去流年劇飛羽  
無復當時倒載歸羣童拍手山公舞

次韻宋永兄感舊五首

猶憶當年歌畫空乘歡直欲舉千鍾韶光半老不相識  
樂事一生能幾逢戲蝶狂蜂隨意好閑花蔓草向人濃  
當壚春色今何在病酒相如卧蜀邛

何用咄咄愁書空何用鼎食鳴金鍾流行坎止隨所值  
撫衮不憂年不逢金釵困嬾海棠睡玉笋淋漓琥珀濃

安能辛勤鍊石髓苦學成周人姓卬

韶齷談經動聖聰山川英氣向來鍾中書落筆萬人繞  
天陛賜袍千載逢利鏢名韁身半老酒徒詩社意偏濃  
莫欺犬子倦游久得志猶能通笮卬

待價君方藏尺璧知音誰解聽號鐘渥注天上非無種  
伯樂人間那易逢墨綬解來三歲改白雲飛處寸心濃  
鷗翔鸞伏古如此直道不容非孔卬

三分春色二分空莫待春歸怨曉鐘詩句逼人何太甚

酒徒知己信難逢  
百年夜永晝愁短  
千樹紅踈綠漸濃  
尊俎班荆元不惡  
試張雲幕席苔玳

雨後春遊

鳴鳩乳燕報新晴  
更被提壺苦勸人  
萬點桃花落紅雨  
十分蕉葉負青春  
醉鄉歸去疑無路  
詩筆拈來似有神  
莫惜千金買一笑  
餘年樂事更闕身

雨後行花圃

習習春風軟遲遲  
春日暄生意遍宇  
宙盡托青皇恩  
屏

翳剛作惡一夜如翻盆奔流萬壑怒比曉千山昏鳴鳩  
喚我起杖屨行中園呼僮理僵仆春事無半存蓬蒿增  
意氣蘭藥遭排根雖無桃李妍却有桑麻繁萬化相除  
謝此理誰明論去去勿復辨榮枯任乾坤

偶成

野鳥春布穀階蟲秋絡絲  
呶呶空過耳終不救寒飢

贈泉守趙表之

令衿二首

禪翁笑擁兩朱輪  
麈尾蒲團付底人  
千里謳吟真刺史

欽定四庫全書

卷上

三朝出入老宗臣春風半道旌旗轉南國一番桃李新  
莫把蹄涔留尺鯉早令圖畫上麒麟

扁舟昔艤浙江邊曾醉王孫玳瑁筵竹杖芒屨晚城上  
金荷銀燭夜堂前宦游我輩聊復爾聚散人間亦偶然  
誰料天涯今八載青燈相對各華顛

春日宴共樂臺

畫棟朱甍插紫清連山帶水自紆縈閭闔高下魚鱗比  
田畝縱橫碁局平花發鳥啼春耐事夜闌客散月多情

寸陰自古千金重一笑人間萬慮輕

秋夜獨酌

溪山態足身無事天地功深歲有秋  
投老相從管城子平生得意醉鄉侯  
捲簾清坐月排闥橫笛誰家風滿樓  
可是離人更遺物自緣身世兩無求

午睡起得富沙信

閒處工夫要破除茅堂一枕黑甜餘  
漆園栩栩看成蝶邊笥便便舊貯書  
掃盡機心還罔象了無行迹便華胥

故人千里能知我遠寄月團供燕居

題順濟廟

枯木擎靈滄海東參差宮殿萃晴空平生不厭混巫媪  
已死猶能效國功萬戶牲醪無水旱四時歌舞走兒童  
傳聞利澤至今在千里危樯一信風


冬日道間

歲熟牛羊飽村寒鳥獸呼霜餘山骨露水落澗毛枯歸  
艇收漁網行人問酒壚微軀任南北未覺旅懷孤

贈延福端老二絕

飄然瓶錫信行藏  
偶駐姜峰古道場  
欲識高人用心處  
白雲堂下一爐香

我來欲問小乘禪  
慙媿塵埃未了緣  
忽憶去年秋夜話  
共聽風雨不成眠



知稼翁集卷上